

Nuwe Lied Bediening



Hy het 'n nuwe lied in my mond gegee, 'n lofprijsing tot ons God sodat baie dit sal sien en respektyvol vrees en op Yahuah vertrou. Ps.40:3.

Yeshua is die Boom van die Lewe. Wanneer ons die Torah bestudeer moet ons onthou dat Yeshua Die Gesalfde Een die Lewende Torah is – die Woord van יהוה wat vlees geword het – die Torah van Malki-Tzedek. Hy is die weg na die waarheid wat lewe gee – die Lewende Manna wat uit die hemel gestuur is. Sonder Yeshua wat deur die Afgesonderde Gees in ons, en deur ons lewe, sal die Torah van יהוה net die dooie letter van die wet wees!!
Yeshua is die hart van die Vader!

Parashah 29: Acharei Mot – Na die Dood

יהוה het met Moshe gepraat ná die dood van die twee seuns van Aharon, wat gesterf het toe hulle nadergekom het aan die Teenwoordigheid van יהוה. Lev. 16:1 – PWL¹

Torah: Lev. 16:1 tot 18:30

Haftorah: Eseg. 22:1 tot 19 – Wat het Verander?

Nuwe Verbond: Rom. 3:19 tot 28; Rom. 9:30 tot 10:13; 1 Kor. 5:1 tot 13; 6:9 tot 11; 2 Kor.2:1 tot 11; Gal. 3:10 tot 14; Hebr. 7:23 tot 10:25.

Parashah 30: K'doshim – Afgesonderde (Heilige) Volk

יהוה het met Moshe gepraat en gesê: “Praat met die hele vergadering van die kinders van Yisra'el en sê vir hulle: ‘Julle moet afgesonderd wees, want Ek, יהוה, julle God, is Afgesonderd. Lev. 19:1 en 2 – PWL.

Torah: Lev. 19:1 tot 20:27

Haftorah:

- Amos 9:7 tot 15 – Die Belofte van Herstel
- Eseg. 20:2 tot 20 – 'n Waarskuwende Voorbeeld

Nuwe Verbond: Matt. 5:33 tot 37 en 43 tot 48; Matt. 15:1 tot 11; Matt. 19:16 tot 30; Matt. 22:33 tot 40; Mark. 7:1 tot 23; Mark. 12: 28 tot 34; Luk. 10:25 tot 39; Rom.13:8 tot 10; Gal. 5:13 tot 26; Jak. 2:1 tot 9; 1 Petr.1:13 tot 21.

¹ Alle teksverwysings is geneem uit PWL (Pad van Waarheid tot die Lewe) Vertaling (www.padwlewe.ch), behalwe waar anders vermeld. Om 'n kopie van die Bybel te bekom kan Gerrie Coetzee per e-pos by gerrie@padwlewe.ch gekontak word of telefonies by 074 361 2134.

Hierdie notas is aanvullend tot die vorige jare se notas vir Parashah 29 en 30 wat afgelaai kan word by: http://nuwelied.info/?page_id=1182.

When a religious person conducts himself no differently than the common, ordinary people around him, he makes God look common and ordinary too. He damages God's reputation. – First Fruit of Zion, 2018.

Silence in the face of evil is itself evil – Dietrich Bonhoeffer

God did not save us to make us happy, He saved us to make us holy – Jerry Benjamin.

We live in a day where we are more afraid of holiness than we are of sinfulness – L. Ravenhill.

A lie can travel half way around the world while the truth is putting on its shoes – Charles Spurgeon.

It is better to be hurt by the truth than to be devastated by lies – Anonymous.

Geestelike Waarheid en die Geskiedenis.

In ons soeke na geestelike waarheid is ons vertrekpunt die versekering dat יהוה se Woord die waarheid is – die onveranderlike! Ons weet dat יהוה geen mens is dat Hy sou lieg nie!

Die Magtige God is nie 'n man dat Hy sou lieg nie, of 'n mensekind dat Hy jammer sal wees nie. Het Hy gesê en sal dit nie doen nie, of het Hy gepraat en sal dit nie waar maak nie?
Num. 23:19.

Maar ons moet ook beseft dat die geskiedenis dikwels 'n hulpmiddel kan wees in ons soeke na geestelike waarheid. Beide die Skrifte van die ou en die nuwe verbond hou verband met geskiedkundige gebeure. Hoewel die Afgesonderde Skrifte ook as 'n geskiedkundige handleiding kan dien, gee dit nie altyd die volledige geskiedkundige agtergrond nie. Daarom is dit dikwels nodig dat ons ook die geskiedenis moet navors, want dit sal help om by die geestelike waarheid uit te kom en om geestelike waarhede beter te verstaan.

Betroubare geskiedkundige bronne kan help om ons van misleiding te bewaar en kan 'n hulpmiddel wees om profesie te verstaan en te verklaar.

Die Gees van die Waarheid lei en leer ons almal en tog kom ons as gelowiges in Yeshua dikwels by verskillende 'waarhede' uit. Ons elkeen glo graag dat ons in die lig van die waarheid wandel, en tog verskil ons dikwels sodanig dat ons onself in verskillende denominasies of groepe groepeer waar ons dit wat ons glo die waarheid is, met oorgawe verdedig. Hoewel ons almal saamstem dat die Skrifte die onderrig en instruksies (die leerstellings) van יהוה is, verskil ons dikwels oor hoe dit verklaar word.

Geestelike groei vind plaas wanneer die inligting en kennis waaroor ons aangaande יהוה se Woord beskik, voortdurend vermeerder. Daarom moet ons beseft dat die inligting en kennis waaroor ons op enige tydstip beskik nie die volle waarheid is nie, want ons almal ken slegs ten dele (1 Kor. 13:9 tot 12). Paulus het hier na blink gepoleerde brons (koper) verwys wat as 'n spieël van daardie tyd gedien het en wat nie so 'n helder beeld weerkaats het as die hedendaagse glasspieëls nie.

First Fruit of Zion skryf die volgende in die verband:

Remembering that we do not see God clearly should help keep us humble. It should make us reluctant to criticize other people's theologies and their experiences with God. They may have perceived an aspect of the Almighty that we have not, or we may have found revelation that has been withheld from them. Neither of us is to be blamed for not seeing the whole picture. In this world, the whole picture is not available. Yeshua told the theologians of His day, "You have neither heard His voice at any time nor seen His form" (John 5:37). That is why a true appreciation for the greatness of God excludes religious arrogance. The Apostle Paul exclaimed, "Now I know [only] in part, but then I will know fully" (1 Corinthians 13:12). Nobody on this side of the veil has apprehended absolute truth (Parashah Acharei Mot, 2016).

Ons almal het leemtes in ons kennis van יהוה en van Sy Woord. Maar wanneer ons met vurige ywer en met 'n leerbare gees יהוה se Woord bestudeer, sal die onveranderde waarheid toenemend aan ons openbaar word.

Daarom het Petrus die volgende geskryf:

maar julle moet groei in die onverdiende guns en kennis van ons Meester en Verlosser, Yeshua, Die Gesalfde Een en van God-die-Vader, aan Wie die eer, lof en aanbidding nou en altyd toekom tot in ewigheid. Dit is waar! 2 Pet. 3:18.

Torah Bespreking

Hersiening

In verlede week se Torahskriflesing (*Tazria* en *Metzora*) was יהוה se onderrig en instruksies oor melaatsheid bespreek, asook die belangrikheid om te kan onderskei tussen dit wat rein en onrein is en dit wat afgesonderd (heilig) is en nie afgesonderd (onheilig) is nie. Hierdie onderskeid is steeds belangrik vir elke gelowige in Yeshua as Die Gesalfde Een. Maar in die ou verbond is die klem op die fisiese, terwyl in die nuwe verbond is die klem op die geestelike toepassing van hierdie instruksies. Dit is egter in die ou verbond wat ons die ware betekenis van rein en onrein, asook van afgesonderd en nie afgesonderd leer.

Melaatsheid word gebruik as 'n sinnebeeld van verwerfde onreinheid en daarom is dit noodsaaklik om te verstaan wat melaatsheid (*tsara'at*) volgens יהוה se Torah beteken en dat dit verskil van wat hedendaags as melaatsheid beskou word.

Melaatsheid volgens Torah is 'n verskeidenheid van siekte toestande wat die vel aantast en geestelike onreinheid veroorsaak, maar ook hoogs aansteeklik was. *Tsara'at* moet daarom gesien word as 'n toestand van onreinheid en onvolmaaktheid volgens יהוה se standaard. Dit is 'n veltoestand wat ontstaan het as gevolg van sonde, spesifiek weens sonde van die tong, naamlik kwaadspraak (skinder) wat in Hebreeus *l'shon hara* genoem word. Daarom kon 'n persoon wat melaats is (oortrek is met *tsara'at*), nie in יהוה se Afgesonderde Plek (die tabernakel) ingaan nie. Melaatsheid (*tsara'at*) in Torah kan gesien word as יהוה se tugtiging van sy kinders. Dit is 'n geestelike en fisiese toestand van onreinheid.

Beide Torahskriflesings *Tazria* en *Metzora* is vol voorbeelde van hoe יהוה se kinders onrein kan word en bevat die instruksies hoe om weer rein te word. Hierdie instruksies was alles 'n skadubeeld ('n sinnebeeld) van die toekomstige verlossing in Yeshua. Daarom volg ons nie meer hierdie instruksies vir reiniging nie, want in Yeshua is dit vervul. MAAR, die beginsels waarvolgens ons as wedergebore kinders van יהוה onrein kan word het nie verander nie!! Die

beginsel waarvolgens ons weer rein kan word het nie verander nie, maar wel die wyse, naamlik soos dit in Yeshua Messias tot volheid gebring is.

Onder die onverdiende guns van die nuwe verbond veroorsaak sonde, naamlik die oortreding van יהוה se Torah soos dit in Yeshua tot volheid gebring is, ‘n geestelike melaatsheid (onreinheid) wat ons isoleer weg van יהוה se Teenwoordigheid! Dikwels is ons woorde die oorsaak van hierdie geestelike onreinheid. Om die tong te beheer is die moeilikste deel van Torah om aan gehoorsaam te wees en dus die maklikste om te oortree!

Hierdie week is daar ook twee Torahskriflesings, naamlik *Acharei Mot* (Na die Dood) en *K'doshim* (Afgesonderde Volk).

Nadav en Avihu

Die vertrekpunt van parashah *Acharei Mot* is die herinnering aan die sterwe van Nadav en Avihu omrede hulle in die teenwoordigheid van יהוה met vreemde vuur gekom het en dit nadat hulle “opgelei” en afgesonder was vir priesterlike dienswerk (Lev. 16:1). Hulle het die waarheid geken, maar nie daarvolgens opgetree nie!

Hierdie is weereens bevestiging en ‘n waarskuwing dat ons nie net die Waarheid moet ken nie, maar dat ons dit ook moet doen! Ons moet יהוה se geregtigheid doen, naamlik om onpartydig en opreg te lewe volgens יהוה se standaard.

As julle weet dat Hy onpartydig opreg is, dan weet julle dat elkeen wat onpartydig opreg leef, vanuit Hom is. 1 Joh. 2:29

Kinders, laat niemand julle mislei nie: wie onpartydig opreg is, is onskuldig net soos Hy, Die Gesalfde Een, onskuldig is. 1 Joh. 3:7)

Welgeluksalig is hulle wat die reg bewaar, die wat altyd geregtigheid doen. Ps. 106:3 (1953, AOV).

Gehoorsaamheid aan יהוה se onderrig en instruksies is om die geregtigheid te doen – om onpartydig en opreg te lewe!

Ons moet die waarheid gaan soek en dit dan doen! Sonder die ‘doen’, naamlik die toepassing van die waarheid, is waarheid nutteloos!

Nadav en Avihu het nie hulle “taakoms krywing” volgens יהוה se voorskrifte (Torah) uitgevoer nie en het gesterf (Lev. 10:2)!! Hulle het die grense van dit wat *kadosh* (afgesonder) en *tahor* (rein) is oorskrei en opgetree in die realm (area) van *chol* (nie afgesonder nie) en *tamei* (onrein). Met ywer het hulle in ‘n toestand van onreinheid volgens hulle eie onpartydige opregtheid opgetree en geglo dit sal vir יהוה aanvaarbaar wees!

Nadav en Avihu het die waarheid geken, maar hulle het nie volgens die waarheid gehandel nie. Hulle het in die teenwoordigheid van יהוה opgetree volgens hulle eie kennis wat hulle as die waarheid beskou het! Dit het hulle dood gekos!

Onthou: Die gevaar is nie in dit wat ons nie weet of nie verstaan nie, maar in dit wat ons dink ons weet en verstaan!!

Die grootste misleiding is die misleiding van die oprigting van ons eie onpartydige opregtheid, omdat ons nie God se onpartydige opregtheid ken nie. Soos Paulus van sy eie volksgenote wat Yeshua verwerp het gesê het:

2 want ek getuig van hulle dat hulle 'n ywer vir God in hulle het, maar nie in kennis nie
 3 omdat hulle die onpartydige opregtheid van God nie ken nie, maar hulle eie onpartydige opregtheid probeer oprig; daarom het hulle die onpartydige opregtheid van God nie gehoorsaam nie. Rom. 10:2-3.

Yom Kippur – Die Groot Versoendag

Die hoogtepunt van parashah *Acherei Mot* is die Groot Versoendag, ook bekend as die dag van Toedekking en in Hebreeus as *Yom Kippur*. Hierdie is deel van die Vasgestelde Tye (Feestye) van יהוה soos in Lev. 23:26 tot 32 beskryf word.

26 יהוה het met Moshe gepraat en gesê:

27 “Op presies die tiende dag van hierdie sewende maand is dit die dag van Toedekking. Dit sal vir julle 'n afgesonderde byeenkoms wees en julle moet in nederigheid vas en 'n offer, deur vuur, tot יהוה offer.

28 Op daardie selfde dag mag julle géén werk doen nie, want dit is 'n Toedekkingsdag (*Yom Kippur*) om vir julle toedekking te doen voor die Teenwoordigheid van יהוה, julle God,

29 want elkeen wat op daardie selfde dag nie nederig vas nie, moet van sy volksgenote afgesny word;

30 asook elkeen wat op daardie selfde dag enige werk doen, dié persoon sal Ek vernietig vanuit sy volk.

31 Julle mag géén werk doen nie; dit is 'n ewige instelling in al julle geslagte, oral waar julle bly.

32 Dit sal vir julle 'n Shabbat van volkome rus wees en julle moet in nederigheid vas. Vanaf die negende van die maand met sonsondergang, vanaf sonsondergang tot sonsondergang, moet julle jul Shabbat hou.”

Yom Kippur is deel van die Herfsfeestye, naamlik die derde en die laaste feesseisoen bestaande uit die Fees van die Basuin (*Yom Teruah*), Die Versoendag (*Yom Kippur*) en die Fees van Tabernakels (*Sukkot*).

‘n Meer volledige bespreking van die doel en betekenis van die Groot Versoendag word in vorige notas bespreek. Hierdie notas kan afgelaai word by [Parashah29Notas14](#).

Maar wanneer ons hierdie gedeelte bestudeer is dit om die geestelike waarhede te ontdek soos dit in ons Meester Yeshua tot volheid gebring is. Hierdie was deel van יהוה se onpartydige opregtheid wat Yisra'el moes doen totdat Yeshua gekom het. Die tabernakel, priesterorde en offerandes was 'n bloudrukplan vir 'n toekomstige heerlijkheid wat deur Yeshua 'n werklikheid geword het!

Daarom is dit belangrik om te verstaan dat beide Pesag en die Dag van Toedekking 'n sinnebeeld is van die versoening met יהוה deur die Lam van God, naamlik Yeshua, Die Gesalfde Een, wat vir ons sondes gesterf het. Hoewel daar ooreenkomste tussen die twee Vasgestelde Tye is, is daar egter ook sekere verskille.

Beide Pesag en die Dag van Toedekking dien egter as herinnering aan die eenmalige offer wat vir vergifnis van sonde gebring is.

6 Die priesters het elke keer in die buitenste Tabernakel ingegaan en hulle bediening uitgevoer,
 7 maar in die binneste van die Tabernakel het die hoofpriester alleen, een maal per jaar, met bloed, wat hy offer vir sy lewe en vir die oortredinge van die mense, ingegaan.
 8 Hierin het die Gees wat Afgesonderd is geleer dat die pad van Afgesonderdheid nog nie openbaar is, solank as wat die eerste Tabernakel nog staan nie.
 9 Dit was 'n bloudrukplan vir daardie tyd, waarin daar geskenke en offers gebring is, wat hom, wat hulle offer, se gewete nie volkome kon maak
 10 deur kos, drank en verskillende reinigingswassing, wat vleeslike instellings is, wat vasgestel is tot op die tyd van hervorming, nie,
 11 maar Die Gesalfde Een, wat gekom het, het die Hoofpriester geword van die goeie dinge wat Hy gedoen het en Hy het die groot en volmaakte Tabernakel binnegegaan, wat nie met hande gemaak is nie en nie van hierdie geskepte dinge is nie.
 12 Hy het ook nie ingegaan met die bloed van jaarou bokke en kalwers nie, maar met Sy eie bloed het Hy een maal in die plek van Afgesonderdheid ingegaan en ewige loskoping verkry,
 13 want as die besprinkeling van die wat onrein is, met bloed van bulle en bokke en die as van 'n vers, hulle kan afsonder tot reiniging van die vlees,
 14 hoeveel te meer sal die bloed van Die Gesalfde Een, wat Homself, sonder vlek, deur die ewige Gees aan God geoffer het, ons gewete reinig van dooie werke, om die lewende God te dien. Heb 9:6 tot 14.

Yeshua het as Ewige Hoofpriester volgens die beeld van Malki-Tzedek die volmaakte tabernakel ingegaan en met sy eie bloed loskoping van sondeskuld verkry vir elkeen wat vertrou in Yeshua as die geslagde Lam van יהוה-God. Yeshua het een offer vir ons sondes gebring en toe gaan sit aan die regterhand van God.

11 Elke hoofpriester staan elke dag om te bedien en dieselfde offers te bring wat van die ou tyd af nooit die sondes kon verwyder nie,
 12 maar Hy het een offer ter wille van sonde gebring en gaan sit aan die regterkant van God vir altyd. Heb. 10:11 en 12.

Ons Malki-Tzedek Hoofpriester het aan die regterkant van יהוה – die plek van eerbewys en outoriteit – gaan sit. Hiermee word bevestig dat ons Hoofpriester se taak van versoening met יהוה deur fisiese offers vir ewig afgehandel is! Die jaarlikse Toedekking van die sondes van Yisra'el is vir ewig afgehandel – vir elkeen wat vertrou in Yeshua as Die Gesalfde van God.

14 want deur een offer het Hy vir altyd die wat daardeur afgesonder is, tot die doel gebring.
 15 Die Gees wat Afgesonderd is getuig ook vir ons en sê:
 16 “Dit is die verbond wat Ek met hulle sal sluit ná dié dae,” sê יהוה; “Ek sal My wet gee in hulle begrip en in hulle verstand, wil en emosie sal Ek dit inskryf
 17 en hulle sondes en hulle oortredinge van die wet sal Ek nie onthou nie,”
 18 maar waar daar vergifnis van sonde is, is daar nie 'n offer vir die sonde nodig nie. Heb. 10:14 tot 18.

Yeshua is ons Pesag en ons Toedekking! Die fisiese is afgehandel volgens יהוה se Raadsplan! Daarom is die doel en betekenis van Pesag en die Groot Versoendag slegs geestelik van toepassing. Ons bring geen fisiese offer nie, maar wel geestelike offers – lofoffers en

dankoffers, asook ons liggame as 'n lewendige offer om as tempel vir die Afgesonder Gees te dien en om יהוה se wil te doen!

Die offers tydens Yom Kippur het egter nie weggeval nie, maar is tot volledigheid deur die eenmalige offer van Yeshua gebring. Deur begrip van die doel en die betekenis van hierdie offers maak ons dit deur vertrou 'n werklikheid in ons lewe.

Die Dag van Toedekking is 'n herinering aan hierdie voltooide werk van Yeshua en 'n herinnering dat die middelmuur van skeiding vernietig is.

11 As gevolg hiervan, onthou dat julle vroeër nie-Jode in die vlees was en 'onbesnedenis' genoem is, anders as hulle wat 'die besnedenis' genoem word en 'n werk is wat aan die vlees met hande gedoen word

12 en dat julle in daardie tyd sonder Die Gesalfde Een was, vreemdelinge aan die nasionale lewe van Yisra'el en vreemdelinge aan die verbond van die belofte, sonder aktiewe verwagting en sonder God in die wêreld.

13 Nou, in Die Gesalfde Een, Yeshua, het julle wat vroeër op 'n afstand was, naby gekom deur die bloed van Die Gesalfde Een,

14 want Hy is ons Vrede, Hy wat albei een gemaak en die middelmuur van skeiding vernietig het.

15 In Sy fisiese liggaam het Hy die haat waardeloos gemaak, wat deur die opinie van mense aangaande opdragte van die wet veroorsaak is sodat deur Sy liggaam, die twee tot een nuwe mens geskep kon word.

16 Hy het die twee se verhouding met God herstel in Een liggaam en deur Sy kruisiging die haat doodgemaak.

Die middelmuur van skeiding wat vernietig is, is ook bewys dat die huis van Efraim en die huis van Juda in Yeshua een geword het! Een Yisra'el met een Torah soos in Yeshua tot volheid gebring is (Matt. 5:17).

Bepeins of Bespreek

1. Rabbynse Judaïsme verwerp Yeshua as Toedekking vir elkeen wat vertrou het in Yeshua as die gekruisigde en opgestane Verlosser. Daarom het Torahgetroue Jode 'n verlange om die tempel te herbou sodat hulle weer die offerandes volgens die Torah van Moses, en onder die gesag van 'n Levitiese priesterorde, kan bring. So sal hulle dan ook die jaarlikse Yom Kippur gedenk volgens die voorskrif soos in hierdie week se Torahskriflesing uiteengesit word. Sal dit nie 'n gruwel in יהוה se oë wees nie? Die bewys dat hulle na al die eeue steeds Yeshua verwerp?!

Vas of Verootmoedig.

Ten opsigte van die Dag van Toedekking lees ons in Lev. 16:29 tot 31 die volgende:

29 Hierdie sal 'n ewige instelling vir julle wees: in die sewende maand, op die tiende van die maand, moet julle in nederigheid vas en géén werk doen nie; die kind van die land sowel as die vreemdeling wat by julle besoek,

30 want op hierdie dag moet hy vir julle toedekking doen om julle te reinig van al julle sondes om voor die Teenwoordigheid van יהוה rein te wees.

31 Dit moet 'n Shabbat van volkome rus vir julle wees en julle moet in nederigheid vas. Dit is 'n ewige instelling.

Hierdie opdrag word ook in Lev. 23:32 herhaal:

Dit sal vir julle 'n Shabbat van volkome rus wees en julle moet in nederigheid vas. Vanaf die negende van die maand met sonsondergang, vanaf sonsondergang tot sonsondergang, moet julle jul Shabbat hou.”

In die 1953 AOV word Lev. 16:31 soos volg vertaal:

‘n Dag van volkome rus moet dit vir julle wees, en julle moet jul verootmoedig. Dit is ‘n ewige insetting.

Die King James vertaal dit soos volg: *It shall be unto you a sabbath of rest, and ye shall afflict your souls.* Dit beteken om jou siel te teister en te beproef.

Die Hebreus vir *in nederigheid vas* en vir *verootmoedig* is *anah*. Die Dag van Toedekking is ‘n dag wat elkeen sy siel, naamlik sy wil, denke en emosie moet teister en beproef of dit in alle opsigte aan יהוה se standaard voldoen. Om te vas kan deel van verootmoediging wees, maar dit is nie waar die klem geplaas moet word nie. Om ‘n dag lank te vas sonder om jou wil, denke en emosie te teister en te beproef of dit in alle opsigte aan יהוה se standaard voldoen, is nutteloos!

Die Hebreus vir vas is *tsoom* soos wat in ondermeer die volgende Skrifgeeelte voorkom:

Toe vra sy dienaars vir hom: “Wat is die ding wat u gedoen het? Terwyl die seun lewend was, het u gevas (*tsoom*) en gehuil, maar toe die seun sterf, het u opgestaan en kos geëet.” 2Sam. 12:21.

Sy het in die briewe geskryf en gesê: “Roep 'n vasdag uit en sit Navot aan die hoof van die mense. 1Kon. 21:9.

Verootmoediging is om jouself te verneder!

Wees nederig voor יהוה en Hy sal julle oplig. Jak. 4:10.

Word nederig gemaak onder die kragtige hand van God sodat dit julle kan oplig op die regte tyd. 1 Pet. 5:10.

Ons lees in Deut. 8:16 dat Yisra’el manna in die wildernis geëet het om hulle nederig te maak en hulle te beproef sodat יהוה uiteindelik aan hulle goed kan doen.

wat jou in die wildernis met ‘man hu’, wat jou vaders nie geken het nie, gevoed het, om jou nederig te maak en jou te toets, om jou ten einde goed te doen.

Yeshua is die manna (brood) wat uit die hemel neergedaal het. Om van hierdie manna te eet is verootmoediging – om jouself te verneder, want dit is om in berou voor יהוה-God te buig en te vra vir vergifnis van sonde – vir oortreding van Sy Torah.

Julle vaders het die ‘man hu’ in die wildernis geëet en het doodgegaan. Hierdie is die Brood wat vanuit die hemel afgekom het sodat iemand daarvan kan eet en nie doodgaan nie. Joh. 6:49 en 50.

Hierdie is die Brood wat vanuit die hemel afgekom het; nie soos julle vaders wat die ‘man hu’ geëet en doodgegaan het nie; wie hierdie Brood eet, sal tot in ewigheid lewe.” Joh. 6:58.

Yeshua is die Manna-Woord van יהוה waarmee ons daagliks gevoed moet word tot vernuwing van ons denke sodat ons kan onderskei wat die goeie, aanvaarbare en volmaakte wil van God is. Ons verootmoedig onself wanneer ons ons liggame beskikbaar stel as lewende, afgesonderde en aanvaarbare offers vir God.

1 My broers, daarom smee ek julle, deur die guns van God dat julle jul liggame beskikbaar stel as lewende, afgesonderde en aanvaarbare offers vir God; dit is julle logiese dienswerk

2 en moenie hierdie wêreld navolg nie, maar word verander deur die vernuwing van julle denke en julle sal kan onderskei wat die goeie, aanvaarbare en volmaakte wil van God is. Rom. 12:1 en 2.

Yeshua is ons Hoofpriester volgens die orde van Malki-Tzedek wat Homslef verneder het en wat gehoorsaam was tot die dood toe.

5 Hierdie gesindheid moet in julle wees wat ook in Die Gesalfde Een, Yeshua, is,

6 Hy wat, terwyl Hy die afbeelding van God was, dit geen roof geag het om soos God te wees nie,

7 maar Homself gestroop en die gestalte van 'n slaaf aangeneem het in die vorm van 'n mens en gevind is in die gedaante van 'n man:

8 Hy het Homself verneder en was gehoorsaam tot die dood toe, die dood deur gekruisig te word.

9 God het Hom daarom ook tot die hoogste plek opgelig en aan Hom die Karakter en Outoriteit (Naam) gegee wat bo elke karakter en outoriteit (naam) is

10 sodat elke knie sal buig tot eer van die Karakter en Outoriteit (Naam) wat aan Yeshua gegee is, dié wat in die hemel en dié wat op die aarde en dié wat onder die aarde is

11 en elke tong sal erken dat Yeshua, Die Gesalfde Een, Die Meester is, tot eer, lof en aanbidding van God-die-Vader. Fil. 2:5 tot 11.

Hierdie gesindheid van Die Gesalfde Een moet ons ook openbaar en dit is wat die Dag van Toedekking 'n sinnebeeld onder die nuwe verbond van is. 'n Gesindheid wat ons elke dag moet openbaar. Ons verootmoedig ons daagliks deur ons nie te weerhou van voedsel nie, naamlik deur te vas nie, maar deur ons te weerhou van die begeertes van die vlees wat hoogmoed en selfsug is. Ons verootmoedig ons voor יהוה deur Sy wil te doen.

Die Dag van Toedekking is 'n herinnering aan die geestelike toepassing van dit wat in die Torah van Moses 'n skaduwee was van 'n toekomstige waarheid wat in Yeshua vervul is. Laat ons dus met die vernuwing van ons denke as 'n Malki-Tzedek priesterorde die Dag van Toedekking gedenk.

Bepeins of Bespreek

1. Lees Jes. 58:1 tot 11 en let op, veral in verse 5 tot 7, die vas (*tsoom*) wat יהוה van ons elkeen vereis. Is dit ook gelykstaande aan verootmoediging?
2. Die Dag van Toedekking is nie net 'n dag van verootmoediging nie, maar ook 'n ware feesdag van dankbaarheid vir versoening met יהוה ons Vader deur die onverdiende guns in Yeshua!

Haftorah Bespreking – *Tazria*

Wat het Verander?

Die Haftorah Skriflesing van *Tazria* (Eseg. 22:1 tot 19) dien as 'n waarskuwing van die gevolge wanneer ons in die realm van onreinheid en nie afgesonderd nie lewe weens ons ongehoorsaamheid aan Vader se Torah.

Wanneer ons hierdie Haftorah Skrif lees kan ons nie anders as om te vra: Wat het verander sedert die dae toe Yegezk'el (Esegiël) hierdie oor Jerusalem, יהודה se stad, geprofeteer het? Wie het gehoor gegee aan die profetiese waarskuwings van Yegezk'el dat oortreding van Torah gestraf sal word? Die antwoord is: Niks het deur die eeue verander nie, want slegs 'n minderheidsgroep wat bely dat Yeshua Die Gesalfde van God is, het deur al die eeue ag gegee op die waarskuwing van יהודה se komende oordeel van diegene wat יהודה se Torah soos dit in Yeshua tot volheid gekom het, en het Torah-gehoorsaam gebly. Dit herinner ons aan die woorde van Yeshua kort voor Sy folterdood:

Yerushalayim, Yerushalayim, jy wat die profete vermoor en dié wat na jou toe gestuur is, stenig, hoe dikwels wou Ek jou kinders bymekaarmaak net soos 'n hen haar kuikens onder die vlerke bymekaarmaak en julle wou nie! Matt. 23:37.

Die Vaderhart het nie verander nie! Steeds begeer יהוה om Sy kinders onder die vlerke van Torah-gehoorsaamheid bymekaar te maak! Maar die verre meerderheid openbaar die gesindheid van die gemeente van Laodicea wat sê: 'Ek is ryk en welvarend en het niks nodig nie'. Hulle besef egter nie dat dit juis hulle is wat siek, bejammeringswaardig, arm en kaal is nie (Open. 3:17).

Yegezk'el se profetiese woorde in Eseg. 22:1 tot 19 geld steeds vandag, nie net vir Yerushalayim (die fisiese Yisra'el – huis van Juda) nie, maar vir elke volk op hierdie aarde. Wat was die oortredinge van Yerushalayim?

- Vers 2 en 3: Bloedvergieting weens kriminele aktiwiteit, maar ook weens rituele moorde; waarskynlik 'n vorm van aborsie. Daar was die wat ook omkoopgeskenke ontvang het om bloed te vergiet (vers 12). Selfs leiers wat verantwoordelik was vir die toepassing van die reg en regverdigheid het vir eie gewin moord gepleeg (vers 6). Selfs kwaadsprekers het leuens vertel om bloed te vergiet (vers 9).
- Vers 3 en 4: Afgodery. Dregode wat hulle gemaak het. Hierdie sluit in enige iets wat die hart begeer en wat bokant יהוה gestel word. Daar was ook die viering van afgodsfeeste (vers 9).
- Vers 7: Ongehoorsaamheid aan ouers en die verwaarlosing van bejaarde ouers (Verwys Jes. 3:5 en Matt. 15:5), asook geweldadigheid teenoor vreemdelinge en die verdrukking van die wees en die weduwee.
- Vers 8: Die afgesonderde (heilige) dinge (soos die Feestyte) van יהוה is geminag en die shabbatte is onheilig.
- Verse 10 en 11: Seksuele sondes van owerspel (hoerery), wellustigheid (pornografie en homoseksualisme. Verwys Lev. 18:22 en 23) en bloedskande.
- Vers 12: Omkoperij en uitbuiting van medemens deur oormatige rente en woekerwins.

יהוה se aanklag teen Jerusalem word met die woorde van Yegezk'el opgesom: *Maar jy het My vergeet, verklaar יהוה-God* (vers 12)!!

Met hierdie profetiese woorde van Yegezk'el in ons Haftorahskriflesing sê hy in werklikheid dat Yisra'el al tien gebooie oortree het. Dan word die vraag gevra:

Kan jou binneste standhou of jou hande onveranderlik sterk wees in die dae wat Ek met jou sal handel? Ek, יהוה, het gepraat en sal dit doen. Eseg. 22:14.

Ons weet dat יהוה 'n waarmaker van Sy Woord is (Num. 23:19). Weens hierdie sondes sê יהוה vir hulle (verse 18-19):

18 die huis van Yisra'el het vir My vuilgoed geword; hulle is almal koper, tin, yster en lood binne die smeltoond; hulle is die skuim van silwer;

19 daarom, so sê יהוה-God: 'Omdat julle almal vuilgoed geword het, let op, Ek sal julle in die middel van Yerushalayim bymekaar maak.

Daarom is Yisra'el verstrooi onder die nasies en versprei in die lande (vers 15). Die uiteinde van יהוה se strafgerigte sal wees: *en jy sal weet dat Ek יהוה is* (vers 16).

In ons bestudering van Torah het ons tot op hede geleer dat gehoorsaamheid aan Torah יהוה se seënninge tot gevolg het en dat ongehoorsaamheid aan יהוה se onderrig en instruksies vloekte (oordele) oor ons lewenspad bring. Die geskiedenis van Yisra'el van ouds, asook die onlangse geskiedenis van יהוה se volk (Jood en nie-Jood; die hele Yisra'el) bevestig dit.

יהוה-God is Regverdig en Geregtheid en Hy is daarom ewe getrou aan Sy seënninge as aan Sy oordele (strafgerigte). Hy kan nie sonde ongestraf laat verbygaan nie. Daarom is die genade van die nuwe verbond nie 'n vrypas tot sonde nie, naamlik die moedswillige oortreding van Torah!

Daar sal 'n dag kom wat elke individu en elke volk voor יהוה se Regterstoel sal verskyn en deur die Woord geoordeel sal word. Yeshua het gesê dat diegene wat Hom verwerp en Sy Woorde (die Torah) nie aanneem nie, het een wat hom oordeel, naamlik die Woord (die Torah) wat Hy gespreek het, dit sal hom oordeel in die laaste dag (Joh. 12:48).

Daarom is יהוה se vraag deur Yegezk'el ook vandag aan elkeen gerig: *Kan jou binneste standhou of jou hande onveranderlik sterk wees in die dae wat Ek met jou sal handel?*

Bepeins of Bespreek

1. Mag ons bewaar word dat die volgende woorde van Yegezk'el nie ook vandag waar word nie:

Ek het onder hulle 'n man gesoek wat 'n muur kan bou en voor My Teenwoordigheid in die bres kan tree vir die land sodat Ek dit nie sou verwoes nie, maar Ek het niemand gevind nie; daarom het Ek My verontwaardiging oor hulle uitgegiet; Ek het hulle deur die vuur van My toorn verteer; Ek het hulle lewenswyse op hulle kop laat neerkom," verklaar יהוה-God. Eseg. 22:30 en 31.

Is jy bereid om in die bres te tree?

2. Is die verre meerderheid wat glo in Yeshua as die Gesalfde van God nie in 'n soortgelyke geestelike verval as in die tyd van Yegezk'el nie? Sal hulle die profeet Yegezk'el, of 'n

profeet soos hy, in hulle midde verwelkom? Die volk van יהוה wou nie na Yegezk'el luister nie! Hoekom sal hulle vandag na hom luister? Wat het verander?

3. Daar was sekerlik die enkelinge in Yisra'el wat nie skuldig was aan die sondes wat Yegezk'el aan hulle uitgewys het nie. En tog het die hele volk gely onder יהוה se strafgerigte! Dit bring ons terug by die vraag van individuele sonde en korporatiewe sonde! Is dit bevestiging dat die suurdeeg van sonde ook uit die gemeenskap verwyder moet word en nie net uit die lewe van elke individu nie?

When the Lord's sheep are a dirty grey, all black sheep are more comfortable – Vance Havner.

-o-o-o-o-o-o-o-

Ontvang יהוה se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shabbat Shalom.

Johan.

Epos: kontak@nuwelied.info

Webwerf: <http://www.nuwelied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.